

Uunga siunnersuut: Illulortiternernut aningaasalersuineq pillugu Inatsisartut inatsisaata allanngortinneqarnera pillugu Inatsisartut inatsisaat

(Radoneqassutsimik annikillisaanissamut taarsigassarsisitsineq tapiissuteqarnerlu)
(Ineqarnermut Attaveqaasersuutinullu Naalakkersuisoq)

Saqqummiussissut

(Ineqarnermut Attaveqaasersuutinullu Naalakkersuisoq)

Siullermeerneqarnera

Illulortiternernut aningaasalersuineq pillugu Inatsisartut inatsisaata allanngortinneqarnera pillugu inatsisartut inatsisissaattut siunnersuut, Naalakkersuisut sinnerlugit matumuuna saqqummiuppara. Soraarnerussutisiallit innuttaasullu akissaatikitsut inissiaminni radoneqassutsimik annikillisaanissaminnut taarsigassarsitinneqarnissaminnut imaluunniit tapiiffigineqarnissaminnut periarfissaat siunnersuutitigut annertusineqarput.

Inatsisartut 2022-mi Ukiakkut ataatsimiinnerminni, aalajangiuffigisassatut siunnersuut immikkoortoq normu 29 siullermeertumik oqaluuseraat.

Siunnersuutip siullermeerneqarnerani, aalajangiuffigisassatut siunnersuummut Naalakkersuisut allannguutissatut siunnersuummik ima saqqummiussipput:

”Naalakkersuisut inissiani nammineq pigisani radon-imut isumannaallisaanermut atatillugu aningaasartuutissanut taarsigassarsititsinissamut periarfissanik pitsannguinnissamik peqquneqarnissaat, tamatumalu inissianut aningaasalersuisarnermut inatsisip iluarsaanneqarnerani tullermi, kingusinnerpaamik 2023-mi upernaakkut pisussami ilanngunneqarnissaa pillugu Inatsisartut aalajangiiffigisassaattut siunnersuut.”

Tassunga tunngatillugu oqaatigineqassaaq, qallunaatuani ”2023-mi ukiakkut ataatsimiinnermik”, kalaallisuanilu ”2023-mi upernaakkut ataatsimiinnermik” allassimammata qallunaatut kalaallisullu allassimaneri imminnut naapertuussimangimmata, kalaallisullu allassimanera eqqortuummat.

Siunnersuutip siullermeerneqarnerani Naalakkersuisut allannguutissatut siunnersuutigisaat tapersorneqarpoq.

Illulortiternernut aningaasalersuineq pillugu Inatsisartut inatsisaata allanngortinneqarnera pillugu inatsisartut inatsisissaattut siunnersuut, 2022-mi ukiakkut ataatsimiinnermi immikkoortoq normu 29-mut aalajangiuffigisassatut siunnersuummut Naalakkersuisut allannguutissatut siunnersuutigisaannik piviusunngortitsivoq.

Soraarnerussutisiallit innuttaasullu akissaatikitsut namminneq inissiaminni najugaqartut inissiami radonimut isumannaajarnissaannut taarsigassarsitinneqarnissaminnut imaluunniit

tapiiffigineqarnissaminnut periarfissaqarnissaat, Naalakkersuisut siunnersuuteqarnermikkut qulakkeerusuppaat.

Illulioriternernut aningaasalersuineq pillugu Inatsisartut inatsisaanni kapitali 3-mi, kapitali 4-mi, kapitali 4a-milu aalajangersakkat atuuttut naapertorlugit, inissiani nammineq pigineqartuni inissiat iluisa silaannaasa radoneqassusiinik annikillisaaniarnernut taarsigassarsisitsisoqarsinnaavoq, tapiissuteqartoqarsinnaalluniluunniit. Taamaakkaluartoq malittarisassat atuuttut naapertorlugit inissiani nammineq pigineqartuni inissiat iluisa silaannaasa radoneqassusiinik annikillisaaniarnernut taarsigassarsisitsinerit imaluunniit tapiissuteqarnerit, sanaartornermi suliaassanut allanut taarsigassarsitinneqarsinnaanissamut imaluunniit tapiiffigineqarsinnaanissamut periarfissanik annikillisitsissapput.

Taamaattumik inissiani soraarnerussutisiallit nammineq pigineqartuni, inissiatullu atorneqartuni inissiat iluisa silaannaasa radoneqassusiinik annikillisaaniarnernut, kommunit immikkut ittumik erniaqanngitsumik akiliutitaqanngitsumillu 100.000 koruunit tikillugit taarsigassarsisitsisinaanissaannik piginnaatinneqassasut siunnersuutigineqarpoq.

Tamatuma saniatigut inissiani inoqutigiittut akileraarusigassanik ukiumut 300.000 koruunit inorlugit isertitalinnit nammineq pigineqartuni, inissiatullu atorneqartuni inissiat iluisa silaannaasa radoneqassusiinik annikillisaaniarnernut, kommunit 100.000 koruunit tikillugit immikkut ittumik tapiissuteqarnissaannut piginnaatinneqassasut siunnersuutigineqarpoq.

Taamatut oqaaseqarlunga Naalakkersuisut sinnerlugit immikkoortoq Inatsisartunut suliaassanngorlugu tunniuppara.